



En memoria da Tonia Monn da Tgesa Nova

Ils 16 d'uost essan nus seradunai en baselgia parochiala per prender comiau da nossa cara mumma, tatta e basatta ed accumpignar ella ella patria celestia.

Naschida ei la Tonia Monn da «tgèsa nuva» sco ella vegneva numnada, ils 22 da fevrer 1918 e carschida si ensemes cun ses treis fargliuns. Ils geniturs Stiafen Monn e Cristgina Giger fagevan il pur sco ils biars da gliez temps e suenter haver finiu las scolas popularas ha la Tonia era gidau sil funs ed en casa nua ch'ei fageva basegns, forzas giuvnas e sveltas eran dumandadas.

Igl onn 1947 ha Luis Monn da Surrein menau la Tonia avon gl'altar da nozzas ed ella ha detg gie cun perschuaioni. Quella lètg ha propi cuzzau tochen alla mort. Quater affons han els tratg si e dau cavegl a tut, e lur veta ei stada emplenida cun satisfacziun e contentientscha.

Ils emprems onns da lètg ha la Tonia era aunc giu quita dil bab Stiafen ed accumpignau el tochen alla mort. Il frar Gion ha era saviu guder veta da famiglia tier la Tonia ed il Luis. Insumma ha la Tonia giu in dun special e beinvlienscha da tgirar ed accumpignar glieud sil davos viadi. Bia notgs ha ella tgirau e vegliau malsauns e moribunds ella vischinonza.

Biars onns ha ella cantau el chor mischedau, ella era ina buna cantadura, fetg premurada e teneva segiramein sia vusch.

In auter hobi era igl ir per puaunas ed izuns. Gl'unviern fageva ella bugen caltschiel; ils davos onns capitava ei magari che las soccas eran onz cuortas.

«Vus veis schon peiuns», scheva ella riend e selegrava da saver schenghegiar pli tard soccas liungas avunda.

Il mariu Luis ha buca giu gest sempel ils davos onns. La Tonia ha tgirau e giu quita schiditg che las reservas da forza han lubiu. Cu il Luis ha stuiu serender en casa da vegls ha ella franc mai schau ora in di da far viseta ad el. Igl onn 1996 ei il car bab Luis morts e la Tonia ha schau encrescher e sentiu bravamein igl esser bandunada. Mo ella ei stada ina persuna ferma e sauna. Cun varga otgonta onns scheva ella cun plascher ch'ella hagi aunc mai stuiu schar dar ina sprezza.

Ils otg beidis han fatg bia plascher alla tatta. Cu ei vegnevan sin viseta era adina in stupent gentar pinaus. «Jeu hai lu schon cumprau in bien glas vin per tei» aschia salidava ella ils schienders. Avon che dar cumiau deva ella enzacons zuchers a mingin sin via. Ella vegliadetgna dad 84 onns eis ella veginida basatta. Quei ei stau in eveniment tut aparti per ella, forsa il pli legreivel mument en ses davos onns. Ella ha gudiu siu sutbeadi en cumpleina schientscha ed emozion ed ei selegrada zun fetg.

Ella vegliadetgna dad 84 onns ha la sanadad era tier ella entschient a schar suenter. Il mal ha sfurzau d'ir en spital e suenter ha ei dau negina autra letga che prender albiert en casa da vegls, igl emprem a Cumpadials e dapi biebein in onn a Sedrun.

Ils davos meins ein stai grevs per ella, il flad mava vess, mo il Segner ha giu cumpasiun e liberau ella. Al Segner sei engraziau.

Cara mumma, Tia largia sa buca veginir remplazzada. Nus engraziein cordialmein per tut il bi e bien che Ti has fatg a nus. Las bialas regurdientschas conforteschan nos cors. Ti has meritau il sogn ruaus.

Stiafen Berther